

藝

菊

志

藝菊志四卷

嘉定陸廷燦扶臆氏輯

詩

四言古

菊榮

蕭穎士

采采者菊於邑之城舊根新莖布葉垂英彼美淑人  
應家之禎有絃旣鳴我政則平宜爾棟崇必後其慶  
其二

采采者菊於邦之府陰槐翳柳通楹近宇彼勞者子  
喧卑是處慨其莫知蘊結誰語企彼高人色斯遐舉

其三

采采者菊於賓之館既低其枝又弱其幹有斐君子  
是焉披翫良辰旨酒宴飲無筭愴其化別終然永嘆

其四

采采者菊芬其榮斯紫英黃萼照灼丹墀愷悌君子  
佩服攸宜王國是維大君是昆貽爾子孫百祿萃之

其五

歲方晏矣露落殘促誰其榮斯有英者菊豈惟春華  
懋此貞色人之侮我混于薪棘詩人有言好是正直

五言古

九日閒居

有引

陶潛

余閒居愛重九之名秋菊盈園而持醪靡由  
空服九華寄懷于言

世短意常多斯人樂久生日月依辰至舉俗愛其名  
露凄暄風息氣澈天象明往鸞無遺影來鴈有餘聲  
酒能祛百慮菊爲制頽齡如何蓬廬士空視時運傾  
塵爵耻虛罍寒華徒自榮歛襟獨閒譎緜焉起深情  
棲遲固多娛淹留豈無成

答休上人

鮑照

酒出野田稻菊生高岡草味貌復何奇能令君傾側

玉腕徒自羞爲君愧此秋金盞覆牙杵何解心獨愁  
和錢員外早冬禁中新菊 白居易

禁署寒氣遲孟冬菊初拆新黃間繁綠爛若金照碧  
仙郎小隱日心似陶彭澤秋憐潭上看日慣籬邊摘  
今來此地賞野意潛自適金馬門內花玉山峯下客  
寒芳引清句吟玩烟景夕賜酒色偏宜握蘭香不敢  
淒淒百卉死歲晚冰霜積惟有此花開殷勤助君惜

東園玩菊

白居易

少年昨已去芳歲今又闌如何寂寞意復此荒涼園  
園中獨久立日淡風露寒秋蔬盡蕪沒好樹亦凋殘

唯有數叢菊新開籬落間  
攜觴聊就酌爲爾一留連  
憶我少小日易爲興所牽  
見酒無時節未飲心欣然  
近從年長來漸覺取樂難  
常恐更衰老強飲亦無歡  
願謂爾菊花後時何獨鮮  
誠知不爲我借爾暫開顏

晚菊

韓愈

少年飲酒時踴躍見菊花  
今來不復飲每見恒咨嗟  
佇立摘滿手行行把歸家  
此時無與語棄置奈悲何

效陶彭澤

韋應物

霜落悴百草時菊獨妍  
華物性有如此寒暑共奈何  
掇英泛濁醪日入會田家  
盡醉茆簷下一生豈在多

甘菊冷淘

王禹偁

經年厭梁肉頗覺道氣渾孟春奉齋戒敕廚唯素餐  
淮南地甚暖甘菊生籬根長芽觸土膏小葉弄晴暎  
采采忽盈把洗去朝露痕俸麵新且細澆搗如玉墩  
隨刀落銀縷煮投寒泉盆雜此青青色芳香敵蘭蓀  
一舉無了遺空愧越盃存解衣露其腹稚子爲我捫  
飽愧廣文鄭饑謝魯山元况我草澤士蒸藿供朝昏  
謬因事筆硯名通金馬門官供政事食久值紫微垣  
誰言謫滌上吾族飽且溫旣無甘旨慶馮知品味繁  
子美重槐葉直欲獻至尊起予有遺韻甫也可與言

題徐致政菊坡圖

王十朋

南方有高士仁義假王喬家山開幽坡手取香草藝  
秋至有黃花采采滿衣袂客來酒盈樽詩出語驚世  
無心學淵明偶與淵明契靜者年自長顏齡不須制  
高懷耻獨樂地遠人罕詣丹青寫佳境有目皆可睨  
吾家鮮鮮徑荒蕪屢經歲儒冠誤此身掛之公得計

十日買黃菊二株

王十朋

十月更十日黃花開滿枝鮮鮮如可餐采采還自疑  
重陽不堪摘况後一月期既晚何用好茲言聞退之  
天然傲霜性寧問早與遲不以日月斷深杯爲花持



采菊圖

王十朋

淵明耻折腰慨然咏式微閒居愛重九采菊來白衣  
南山忽在眼倦鳥亦知歸至今東籬花清如首陽薇

和洪教菊

林少穎

陶令遺世情尚餘愛菊念菊亦有可愛愛之苦不厭  
我觀傲霜枝真金赴烈焰道韻輕園綺孤標敵鍼奄  
配以靖節名萬古不爲忝况茲中央色獨許此君占  
凝然端正姿不受紅紫艷草木吾味同世情那得染  
璀璨歸來辭斯言了無玷偶亦愛此花秋來朝暮屢  
富貴如浮雲天地一旅店是中論饑飽本自無贏欠

便擬學淵明奈此才不贍菊資三徑荒酒須十分  
待讀悠然句乃無雍徹僭但論廣文詩瘧愈不須  
西齋植菊過節始開呈聖俞 歐陽修

秋風吹浮雲寒雨洒晴曉鮮鮮牆下菊顏色一何好  
好色豈能常得時仍不早文章損精神何用覩天巧  
四時悲代謝萬物惜凋槁豈知寒鑑中兩鬢甚秋早  
東城彼詩翁學問同少小風塵世事多日月良會少  
我有一樽酒念君思共倒上浮黃金藥送以清歌  
爲君發朱顏可以却君老

甘菊

司馬光

野菊細瑣物籬間私自全徒因氣味殊不爲庖人捐  
米升白玉堂薦以黃金盤願若南陽守永扶君子年

晚食菊羹

司馬光

朝來趨府庭飲啄厭腥膻况臨敲朴喧憤憤成中煩  
歸來褫冠帶杖屨行東園菊畦濯新雨綠秀何其繁  
平時苦目疴滋味性所便采擷授廚人烹滷調甘酸  
毋令姜桂多失彼真味完貯之鄙陽甌薦以白木盤  
嚼啜有餘味芬馥逾秋蘭神明頓颯爽毛髮皆蕭然  
乃知愜口腹不必矜肥鮮嘗聞南陽山有菊環清泉  
居人飲其流孫息皆華顛嗟余素荒浪強爲簪綬牽

何當緝敵廬脫畧區中綠南陽句嘉種蔣彼數畝田  
抱甕親灌溉爛漫供晨餐浩然養恬漠庶足延頽年  
菊  
蘇洵  
騷人是奇思香草比君子况此霜下傑清芬絕蘭茝  
氣稟金行秀德備黃中美古來鶴髮翁餐英飲其水  
但恐蓬蒿傷課童加料理

咏蘇子美庭中千葉菊

梅堯臣

生與衆草生不與衆草榮彼皆春爭葩茲獨秋吐英  
千葉共一莖百蒂共一莖陶亭聳扶疎獨本非摛撐  
吾友蘇子美有酒對自傾香隨青陵蝶色映黃金鸞

昨日偶來過頗興陶令情

次韻和原甫陪永叔景仁聖徒飲余家題庭  
中枯菊之什

梅堯臣

九日車馬過我庭黃菊鮮重來踰七旬枯萼無復妍  
自非凌霜搯枝葉徒相連衰敗未忍去根荄尚翹然  
不意憔悴叢猶爲君子憐固值時節晚豈恨地勢偏  
直如木上蘿緣蔓欲到天一朝風雪厲零落向暮年  
至此事乃等高低復何言公休誇松栢彭祖與顏淵  
各不相健羨焉能論柔堅願公時飲酒周孔今下泉

菊

梅堯臣

野菊生秋澗芳心空自知無人驚歲晚惟有暗蛩悲  
花開澗水上花落澗水滄菊衰豈亦螿與汝歲相期  
楚客方多感秋風咏江籬落英不滿掬何以慰朝饑

甘菊

梅堯臣

越山春始寒霜菊晚愈好朝來出細蕊稍覺芳歲老  
孤根蔭喬松獨秀無芳草晨光雖照暉秋雨未摧倒  
先生臥不出黃葉紛一埽無人送酒壺空腸嚼珠寶  
香風入牙頰楚些發天濤新英蔚已滿宿根寒不槁  
揚揚弄芳蝶生死何足道頗訝昌黎公恨爾生不早

謹和相國屋上叢菊

梅堯臣

屋上有叢菊結根深瓦縫既無地勢美又乏土力擁  
乃因塗明生不由人所種亦能應節開焉取入公用  
公來步廣庭聞雁目始縱忽見粲然英降植合窻從  
賓僚席其傍咏玩意已重物莫厭僻遠會遇良可頌

十日菊

孔平仲

昨日酒中花今日籬下草馨香尚未改棄置一何早  
怨泣露華濕世情安可保

和聖俞庭菊

蘇舜欽

不謂花草稀實愛菊色好先時自封植坐待秋氣老  
類粧翠羽枝已喜金曆小嚴霜發層英益見化匠巧

搖疑光艷落折恐叢薄少一日三四吟一吟三四遶  
賞專情自迷美極語難了得書所賦詩爛漫感懷抱  
朗吟償此花心清爲之倒

問司馬君實不飲栽菊

江休復

君實不飲酒庭下多栽菊不知黃花開奈此盃中綠  
凌晨烟露滋後日風霜促欲表君苦心宜種子猷竹  
叢菊頗有開意戲題

李綱

愛菊如淵明憑欄惜花晏朝來有開意嫩蕊肥欲綻  
顛承玉露溥一吐金英粲臨風嗅馨香爲爾發三嘆

菊花開日卽重陽

李綱



南方氣候殊有菊卽重陽九日今已近青菜未可嘗  
安得黃金花泛此白玉觴會當爛漫開爲插滿頭香

重九後三日後圃黃花盛開坐客有論近世  
菊品日繁未經前人賦咏惟明道嘗賦桃花  
菊外此無聞焉因與第其品之稍顯者各賦  
一品余探題得桃花菊

魏了翁

南陽有佳人被服長修姱黃中榮有章秀外青無花  
朝飲晉柴桑夕餐楚長沙惟與高人處耻作流俗夸  
元都有俗士品格固穢差遺之以潘沐強欲相塗搽  
南陽笑謝遣于此我何如游女蕩春風漁人眩紅霞

爾比予于是豈欲相疵瑕卿自用卿法吾亦愛吾家  
寄聲謝程子爲我刪此花

寄題尚撫州采菊亭

范成大

一葉起秋色衆綠凋歲華耿耿霜露側餘此黃金葩  
西風蒲天地孤芳照塵沙殷勤開小築花氣日夕佳  
落英楚纍手束籜陶令家兩窮偶寓意豈必真愛花  
不如亭中人一笑了天涯采采勿虛度門前欲高牙

陶靖節人品甚高晉宋諸人所未易及讀其  
詩可見胸次灑落八窗玲瓏豈野馬遊塵所  
能棲集也前建安丞張公精力未衰卽掛冠

家於瀏陽有年矣葺小園爲亭面南山來求  
余名余名之日采菊取靖節所謂采菊東籬  
下悠然見南山嗚呼靖節與寄深遠特可爲

識者道耳

張拭

陶公千載人高標跨餘子豈無濟時念歛蔭獨知止  
歸來臥衡門無愠復何喜九日天氣佳東籬擷芳蕞  
舉頭見南山佳處正在此地偏心則遠意得道豈否  
張侯謝銀魚築室娛燕几小亭才尋丈景物自新美  
頗聞雙瞳清亦復強步履不妨數登臨倚杖看雲起  
高咏悠然篇飛鴻送千里

陶淵明云三徑就荒松菊猶存蓋以菊配松也余讀而感之因賦此詩

陸游

菊花如端人獨立凌冰霜名紀先素書功標列仙方  
紛紛零落中見此數枝黃高情守幽貞大節稟介剛  
乃知淵明意不爲汎酒觴折嗅三嘆息歲晚彌芬芳

小飲賞菊

陸游

菊得霜乃榮性與凡草殊我病得霜健每却稚子扶  
豈與菊同性故能老不枯今朝喚父老采菊陳酒壺  
舉袖舞翩躚擊缶歌嗚嗚秋晚遇佳日一醉詎可無

次韻龍仁夫種菊

俞德鄰

憂來感人心把菊行東籬悠然南山句憶此刪後詩  
詩人絕道嚮菊在餘幽姿麟洲有達士與菊心相期  
左揖隆中老右揖綿上推汎此忘憂物聊以供我私  
真樂未易識勝事空自知金風撼撼鳴金英發發垂

菊

陳與義

黃花不負秋與秋作光輝夜霜爲作崇朝日爲解圍  
今晨豈重九節意入幽非孤芳擅天地衆卉亦已微  
殷勤黃金騰照曜白板扉沽酒欲壽花孔方與我遠  
靜坐絕省事未覺此計非夕英豈不腴騷人自難肥

菊

高文虎

菊載神農經不見詩三百周官敘鞠衣一言儘可摘  
黃華紀呂令落英餐楚客伯始欲得壽桐君書探贖  
移根候萌動需時當甲拆我羨柴桑里敢希履道宅  
不種兒女花朱朱與白白閱譜品雖多求栽地恐窄  
掘苗助其長抱甕滋以澤朗咏黃爲正流播風騷格  
寒香紫萼蘭晚節桐柯栢相繼早梅芳一笑巡簷索

次韻鄭使君白菊

周紫芝

平生鄭康成不種花嬋娟但聞書帶草羅生滿堂前  
佳菊若解事殷勤爲公妍紅油護霜日一笑真嫣然  
秋風轉寒枝束素爭回旋團樂立芳砌皎若碧月圓

使君頗牧手年來出臨邊燕行自折衝資從時招延  
苦愛白玉姿臨風嗅芳鮮揚州東閣梅自此復誰憐  
安得白雪詞寫入朱絲弦淵明眼獨醒載酒知誰先  
騷人茹精蘂世塵聊自蠲幽姿倏已空二士窮益堅  
人生五馬貴行樂須何年絕勝杜陵老江花惱成顛  
才名與富貴似公真兩全新詩如脫彈一出萬口傳  
鋒車行復來琬琰殊未鐫且當對香雪燕寢凝沉箋

題采菊圖二首

韓駒

黃菊有何好且寄平生懷遇酒興不淺無酒意亦佳  
此理誰復明自昔寡所諧空餘采菊圖寂寞懸高齋

其二

今日菊始華叢鴈鳴相和若無一觴酒如此重九何  
悠然數酌盡會心豈在多醒來不復記散髮東山阿

菊苗

彭汝礪

重陽黃菊花零落殆無有微陽動淵泉嫩葉出枯朽  
青青好顏色寂寥霜雪後物理如轉環開花豈其久

其二

盛衰各一時何足競先後彼花以無情能並天地久  
物理如轉環昔亾乃今有眷言籬邊菊根葉未終朽

菊叢

張耒



下根盤秋泥上葉披宿雨惟餘黃金蕊秀色日夜吐  
寧須薦九日但惜歲行暮吾將屑落英特走蘭皋路  
擷我百結衣爲君採東籬半日不盈掬明朝還滿枝  
悠然何處是千古正如斯

十日菊

謝翱

今日非昨日尚覺秋英好明日異今日秋英詎云早  
所以惜芳人采擷常貴少而彼千載士憐爾獨皎皎  
晞霜敷朝榮零露抱夕槁千載且復然一夕寧恨老

白菊

朱德潤

采菊

韓

竹坡

退官陶靖節送酒白衣來黃花厭土色化爲清白栽  
寒香當獨酌晚節共徘徊籬邊無俗客甕下有餘醅  
九日百年醉一生能幾回

對菊

鄭剛中

淵明不可作遺芳落天涯幽香抱孤蕊正色敷金蕤  
眷言出俗韻寒透方相宜南方十月溫不見落葉飛  
江氛與嶺稜負此傲霜姿向晚過微雨月波湛明輝  
風高便覺好獨酌臨東籬對之不須寐要看清露滋  
十月十日偕同館賞菊

孫陞

斗杓指孟冬寒氣日以肅高會啟華軒猶茲見黃菊

曄曄當廣筵涓涓出塵俗  
挺挺雨泔泔滋盈盈露堪掬  
良朋共追賞飛觴汎醴醪  
劇談散幽襟日夕仍秉燭  
嗤彼桃李姿春風競妍郁  
弱質隨衆草委謝一何促  
冷然悟至理俛仰傷蓄縮  
願厲凌霜操同心振芳躅

采菊

吳景奎

爽氣浮西山風烟淡原隰  
悠然出衙門佳節逢九日  
衆草淒以清黃菊正秋色  
采之不盈把妙意良自得  
謂能制頽齡可洗忘憂物  
歡言命壺觴萬事付酣適  
永懷東籬人俯仰已陳迹

檢校菊吟

范梈

百花已爛漫，虐雨更及辰。疾風吹青空，好日麗芳鄰。  
自知園居僻，少與繁會親。編籬種黃菊，原不計秋春。  
昨朝新芽吐，大葉已輪囷。軒昂各有意，未謂非其神。  
故廬陵雲下，苦壤多荆榛。孤芳久不見，貰酒問遠人。

家子一四淵明采菊圖見贈 魏廷薦

茅屋四五間，修竹一二畝。東籬繞曲折，南山安戶牖。  
芙蓉既盛開，菊又當重九。此際陶淵明，寧無人送酒。

雨中對菊

程俱

胸中有天遊，一室未爲迫。永懷東籬翁，那復有此客。  
重陰敗佳辰，長雨不爲澤。堆厓對黃花，菜色被臧獲。

黃華亦蕭蕭伴我雙鬢白猶能相啣嚙嫩葉供小摘  
東籬採菊圖  
趙秉文

淵明初亦仕迹留心已遠雅志懷林淵高情邈雲漢  
妖狐伺晝昏獨鶴驚夜半平生忠義心回作松菊伴  
東籬把一枝意豈在酒醞不見白衣來目送南山雁  
澹然忘言說聊付一笑粲

西湖晚菊

党懷英

重湖灑城菊佳菊被水涯高寒逼素秋無人自芳菲  
鮮飈散幽穠晴露墮餘滋蹊荒綠苔合采采嘆後時  
古瓶貯清泚芳樽剪塵霏遠懷淵明賢獨往誰與期

徘徊東籬月歲晏有餘悲

咏菊

熊禾

廬峯幾千仞中有雲一龕幽幽避世人誅茅結爲菴  
我嘗造其間追尋巫出採山中滿園蕙谷口羅松杉  
更有藥圃畦種菊杞與甘療疾還延年未數菊水潭  
百年未云久澗草空毵毵我居北澗北子住南澗南  
偶然此鄰並如處誰能參古來種菊人祇言晉陶潛  
當年移南村北地何所賦亦日素心人可與共晤談  
云何舍之去我懷殊未諳八表方停雲處處迷征騶  
何如且歸來理此荒徑三歲晚永爲伴青松冠前巖

唐人愛牡丹末俗亦易酣保此霜下傑母令澗懷慚  
萬古晉徵士可使頑夫廉題作柴桑人綱目書法嚴  
我欲質巾几白雲滿虛簷

野菊

郝經

乾坤入消數萬物呈晚節秋晏菊始華荒叢翳林樾  
野迥幽姿清岡斷寒艷接絲蟲冑青苞啼蟹抱枯葉  
灑露積玉華屑屑擁金屑我欲摘以盃飲之濯中熱  
霜栽郁高標胡與荒穢列嗟爾夷惠儔玉質難變滅  
不謂無人看便使幽香歇安得老瓦盆坐對澆古月

題胡氏存菊堂

傅與礪

素商薄庭戶豐草日以萎晨興顧林薄百卉無復遺  
叢菊依前除遲暮獨相依清颺振綠葉零露發幽姿  
淹留諒有俟暴盛非所期對此時物佳欣然賦新詩  
嘉賓旣在門有酒復盈卮日暮採其英斟酌及茲時  
四序委元化焉知榮與衰

寄題上饒鄭氏菊莊

揭傒斯

上饒多隱者鄭氏善爲方移居倪陽里種菊今成莊  
近取徧吳楚遠求至帝鄉品類百十餘顏色不可常  
漑以玉井泉樊以柳與楊晨興卽造之不憂露沾裳  
有時忘饑渴餐之以爲糧門無催租吏家有白玉郎



花前撫鳴琴花下列壺觴興至輒痛飲飲罷臥其傍  
自謂得菊趣不知與菊忘但恐秋景晏繁露結爲霜  
盆盛虛室中虛室仍面陽重簾設夕氣疎踰逗朝光  
亂以清蒲水石儼成行重得隱者心不辱桃李場  
玩物安足計歲晚託餘芳

采菊

周如磐

高秋凜秋色百草遡萋黃嘉彼東籬英參差挹露光  
采之不盈掬悠然傾我觴杖策寄事外仰視歸鳥翔  
會心水木間獨坐以徜徉

題秋菊軒

王綬

九月霜露零秋氣已云肅草木盡凋瘁而有籬下菊  
粲粲如有情盈盈抱幽獨我欲餐其英采之不盈掬  
呼兒具鷄黍白酒正可淥素心二三人於焉彼心曲  
陶然付一醉萬事亦已足咏歌柴桑詩千載想遐躅

野菊

陳高

野菊生籬下開花一何遲晨霜白滿野金英粲離離  
幽香空自媚佳色無人知不如桃與李花發正逢時

菊

何中

菊花如幽人梅花如烈士同居冰雪中標格不相似  
道里阻荒寒故人萬里餘菊枝倘可折持以寄遠書

和陶淵明擬古

戴良

墻頭有叢菊粲粲誰復採蹉跎歲年晚香色日以改  
我欲一往問澗澗阻州海遙知霜霰繁莖葉不余待  
亦既輕去國已矣今何悔

菊鄰

高啟

菊本君子花幽姿可相親清秋發孤艷似避東風塵  
采采霜露餘繁英正鮮新車馬不過賞相看但幽人  
幽人苦愛菊自是柴桑倫閑園誰與語發栽四爲鄰  
入徑朝摘遠循籬暮觀頻一壺每對酌折花插盈巾  
殊勝處俗里歌呼醉遭嗔

菊窻

張羽

種菊南窻下草盛菊苗稀嘗恐隨蕭艾芬芳永無期  
四週相催迫嚴霜百卉腓依依三徑中亭亭見高姿  
微芳從地起朝露濯其枝銜觴泛九華歡言賦新詩  
因之感中懷物理貴及時顧當盛夏月那復知有茲  
衰榮更代謝天道不我欺且當委窮達一醉不復疑

種菊

徐賁

蕭條齋舍前隙地頗高爽茲焉倦耘鋤而乃成廢壤  
邇來學種菊始爲驅草莽掩冉籬落間枝葉紛以長  
雖煩灌溉勤亦藉雨露養秋香固所悅晚節益可仰

匪日表隱名聊以備幽賞

對菊有感

姚廣孝

百艸競春色惟菊以秋芳豈不涉寒暑本性自有常  
疾風吹高林木落天雨霜誰知離落間弱質懷剛腸  
不怨歲月曠所悲迫新陽永歌歸去來此意不能忘

分菊

姚廣孝

嗜菊詎成性仍非慕前修籬邊夏雨足芳叢生已稠  
分蒔攜短鍤溉灌羣清流白黃因葉閒列自成幽  
英後百卉落苗隨衆草抽不有今日勞那得慰深秋

題章元益愛菊亭卷

李東陽

種花不種菊物玩志不持學詩不學陶雖工亦奚爲  
隱者丘壑情幽芳冰雪姿陶翁昔愛菊此興固其宜  
章君本宦迹斂跡東江湄林君絕衆非愛此黃蕊豨  
居以花爲鄰行以書自隨飄搖北風外喘咏南山詩  
南山何崔嵬下有荆棘枝棘多損我花路遠我勞思  
何當籬荒穢永與塵埃辭茲願必終遂坐待秋風時

涇上觀菊

王問

涇上一老人愛菊如愛稼踏葉到林丘散襟茅茨下  
青柯吐芳英采采漸盈把睠言五色姿陽春似相假  
晚節良可親予懷自舒寫有物苟會心那辭在荒野

歲晏不可留柴車瓜云駕奕奕車馬客誰解開行者

九日題菊

王問

青柯發金英盈盈我庭下移置燕坐隅素懷自欣寫  
秀色映襟袂寒香落杯筭儼焉正士俱相與揖讓者  
無意龍山飲歸來通荒野秋風此敝廬疇謂幽事寡

題甘泉菊坡

王守仁

我聞甘泉居近連菊坡麓十年勞夢思今來快心目  
徘徊欲移家山南尚堪屋渴飲甘泉泉饑餐菊坡菊  
行看羅浮雲此心聊復足

維南有作菊

胡翰

維南有佳菊風露發清妍離離綠玉樹粲粲黃金錢  
色含坤裳美質抱日精圓蘊靈自女兒滋布瀾樊川  
既入神后品還克仙子餐中壽登百歲上壽延千年  
千年與百歲何異瞬息間獨有幽貞節可比金石堅  
託以奉君子歲晏期弗諼

採菊篇

王宗沐

未就歸來賦展爲塵世嬰藝菊滿東籬稍慙林園情  
天宇澄秋景蟋蟀愆商聲雨時花轉繁霜薄芳念清  
眷言擷短裾采采多落英延賞肅素履夕餐踐幽盟  
三徑遂已荒焉事九畝樂流化遞尋繹倏忽年鬢驚



志厭鼎食披服草木精茲焉諒所甘翩翩翰羽輕  
咄予以玩物兼得資長生

題菊

王翰

我憶故園時繞籬種佳菊交葉長青蕊餘英吐芳馥  
別來二十載粲粲抱幽獨豈無桃李顏歲晚同草木  
及蒸馥餘芳使我淚盈掬離披已欲摧瀟洒猶在目  
雨露豈所偏歲月不可復歸去來南山餐英坐空谷

靈菊篇效陸平原

楊慎

靈菊植幽崖擢穎凌寒飈春露不染色秋霜不改條  
三泉漱玄根九陽晞素苗衡星散光晶香氣何飄飄

東林生玉樹西畹生蘭翹  
懿此蕙蕤茂感彼芸黃凋  
采爲仙人食千載通一朝  
金童酌霞醴神女彈雲璈  
顧視西王母翠髮如陵苕

菊圃

譚元春

愛菊待佳花良非知菊人  
微雨過秋色遠舍重九神  
有韻卽堪對黃白非所論  
除草疎餘塊澆別當必身  
螭螭胡爲來捕殺於其晨  
旣害我田穉傷菊罪惟均  
感此不能去籬邊行數巡  
計到花開後蹤跡難具陳

咏盆菊

董其昌

衆芳豈不妍秋英自清絕  
意與幽人會標名霜下傑

容以桃李顏艷彼茱萸節翩翩五陵子焦色紛相悅  
積紫照朱茵堆黃象金埒賞韻一以乖離堵寧辭曲  
亭亭盆中菊偏承美人擷香分甘谷幽色借水壺潔  
對此讀離騷心魂坐瑩澈悠然見西山孤峯正嶽嶽

擬古

唐時升

白露裊黃華朝來行采采服以制顏齡容色常不改  
眷眷欲遺誰所思隔雲海馨香日夜衰含情更難待

東臯種菊詩贈稼軒給諫

錢謙益

菊以黃爲正君子正其名所以東坡老欲掃紫與頰  
東臯千株菊畦圃吁未經單心複纏枝千葉并萬鈴

庶以說耳目何用機品評節物苟如此敢與時好爭  
高咏南山詩悠然想淵明

其二

君耕東臯田復種東籬菊王績與陶潛俯仰共一屋  
東臯黃花時候望節候獨陶令苦乏酒辜負葛巾漉  
羨君浣溪堂秋菊粲盈目有花復有酒開筵招近局  
何須嘆荒寒已許占清福酌酒酌兩賢如農祀先穀

其三

種菊東臯上所喜秋露灑移檻復列斛馥郁開草堂  
叢菊如羣賢不雜屠沽行其中高秀者黃衣傲風霜

對之不敢媿肅拜陳壺觴君爲醒無功我似瘖千光  
秋光淡如菊燕靜彌芬芳老圃良足學晚節安可忘  
旨哉東臯詩山菊秋自香

其四

胡廣患風疾休沐飲菊水八十猶克壯侍母謝杖几  
庸庸撓大議公台負譏毀惜哉神仙藥遺穢等馬矢  
靈均餐落英早沉汨羅死安知椒蘭徒壽考非伯始  
種菊愛其芳紛紛且休矣不如飲君酒共醉寒香裏

和牧翁東臯觀菊

程嘉燧

去年集西園繞簷數本菊今年集東臯粲粲黃金屋

翹然殿衆芳森矣媚幽獨華觴旣見命濁醪勝新漉  
久服云輕身小啜亦明目遠縣高陽會近邀鷄黍局  
老圃幸有秋寒翁豈非福餽之可爲糧用此豐年穀

其二

佳節當重九舉世貴其名茲花獨秀出衆卉皆含頰  
餐英挹墜露聞之離騷經陋彼綠華子施障仍掣鈴  
飄飄黃冠者姚魏孰敢評穆然來清風高與南山爭  
對之復不飲能無愧淵明

其三

甘谷產芳菊其下酈陽水飲之壽百歲飛步却杖几

浪叢胡公辱千載貽譏毀豈無史魚儔直哉但如矢  
同凜霜下傑何計道旁死自沉促靈均苟祿延伯始  
富貴何有哉賢佞共盡矣不見紫與朱綠衣乃黃裏

其四

黃花又矣敷零露朝以灑熇熇丘園姿羅列君子堂  
舟車咸來臻肴炙紛成行良辰夜何其白露凝朝霜  
主人更爲壽累稱千金觴追隨飛蓋遊徘徊明月光  
華燈已代地襟袖猶攜芳菲菲芝蘭側漸久意已忘  
申章咏佳什拂坐流寒香

野菊

王建

晚籩出荒籬冷香着秋水意向山中見伴蛩石壁裏

對菊

賈島

九日不出門十日見黃菊灼灼尚繁英美人無消息

對菊

鄭思肖

天風吹古秋獨立殿寒酸我父昔愛之終身不念菊

其二

受命太極前立身晚秋後一朝揚清香名動天下口

對菊

汪應

奇葩豈絕域穠豔恣幽籠却笑博望侯空帶葡萄種

對菊

王養正



仙人授錦囊中有百年草本是駐顏丹人間不知寶

莊菊

林誌

別業依南山投閒忽成趣白露朝欲晞黃花滿籬戶

其二

餐英慨前修采之恐遲暮苦無二三徑資眷此歸來賦

菊蹊

高啟

獨行林下路望望南山暮無酒掇英嘗寒香已零露

咏白菊

王宗沐

皓月照孤英素影抱寒石應非爲世姿洗盡繁華色

采菊

謝榛

籬下黃金花  
幽人時復采  
滿天霜露寒  
莫待秋容改

菊

吳國倫

銜杯祝叢菊  
種異香亦異  
綽約霜露姿  
形神兩相寄

五言排

咏夾徑菊

薛能

夾徑盡黃英  
不通人並行  
幾曾相對綻  
元自兩行生  
叢比高低等  
香連左右并  
畔搖風勢斷  
中夾日華明  
間隔蛩吟隔  
交橫蝶亂橫  
頻應泛桑落  
摘處近前楹  
恩門小諫  
雨中乞菊栽

鄭谷

握蘭將滿歲  
栽菊伴吟詩  
老去慵趨世  
朝迴獨繞籬

遍香風細細澆綠水瀾瀾  
抵共山僧賞何當國士移  
孤根深有托微雨正相宜  
更待金英發憑君插一枝

南海使院對菊懷丁卯別墅  
白居易

何處曾移菊溪橋鶴嶺東  
籬疎還有艷園小亦無叢  
日晚秋烟裡星繁曉露中  
影搖金澗水香染玉潭風

罷酒慚陶令題詩答謝公  
朝來數花發身在尉陀宮

和令狐相公玩白菊

劉禹錫

家家菊盡黃梁園獨如霜  
瑩淨真琪樹分明對玉堂  
仙人披鶴氅素女壓紅粧  
粉蝶來難見麻衣拂更香

面風搖羽扇含露滴瓊漿  
高艷遮銀井繁枝覆象床

桂叢慚並發梅萼妒先芳  
一入瑤華咏從茲播樂章  
贈朱遜之

蘇軾

黃花候秋節遠自婁小正坤裳有正色  
鞠衣亦令名一從人僞勝遂與天力爭  
易性寓非族改顏隨所令新奇既易售  
粹駁定相傾疾惡逢伯厚識真似淵明  
君言我所印世論誰改評願君爲霜風  
一歸紫與頰

樞密王左丞宅新菊

錢惟演

賀燕翻飛地靈芳逐莢時陰連桃李徑  
潤接鳳凰池夕照輝金葆輕風拂翠蕤  
露珠清自沍烟素引還披西顥霜雖勁  
南榮暖更滋擷芳多楚澤得地勝陶籬

味可登蘭藉香應奪桂旗願公長却老宴寢奉瓊卮  
前題

楊億

中樞多暇日小圃占秋光雕玉新成檻繁金乍泛觴  
陶籬侵柳色羅宅掩蘭芳芝影連虛室萱聲接後堂  
傳巖猶借雨庾嶺未飛霜溫樹偏分蔭芸籤亦鬪香  
交枝遮露井墜葉點橫塘桐籙知延壽千齡奉紫皇

前題

劉筠

東閣留佳客寒葩詭晚光秋風自蕭瑟台座對熒煌  
麗奪雙南價清杏九畹香嫌山霜薦味太液鵠分裳  
已助蜂成蜜還隨蟻泛觴俯臨揮艾綬佩服間萸房

節物傳荆俗詩情掩謝塘更期松偃蓋永奉太清方

前題

李繼

青規前席暖歸沐與何長北第秋將晚東籬菊正芳  
幽叢霏薄霧桂色艷輕霜已近黃金印兼臨白玉堂  
甘疑掩萍實秀肯讓芝房有佞還應指無憂可要忘  
蕤浮丞相酒氣馥令君香好固松椿壽仙經識秘方  
九日山園小宴取五柳公采菊東籬下爲韻

賦詩侑觴

段克巳

世無李元禮誰容孔北海長歌歸去來籬菊無人采  
古來賢哲人餓死填空谷清杯幸不空且醉籬邊菊

風雨山城暮黃花自滿叢幽懷若爲寫正要玉西東  
愛菊陶元亮持杯對菊枝醉時推客去猶復有漉籬  
餼餐秋菊英采采不盈把日落西山昏獨坐衡門下

寄題楊教授菊莊

揭傒斯

歸人種菊處乃在東海涯幽香發清真正色間奇葩  
百種猶未慙千株寧足多寒分石橋月晴通赤城霞  
特起表陰尻羅生騁陽阿門巷掩蒿萊荒徑絕經過  
飲露咀其英孰知年歲遐

霜菊

席夔

時令忽已變行看被霜菊可憐後時秀當此凜風肅

折盡翠枝翻淒清金蕊馥凝姿節堪重澄艷景非淑  
寧祛青女威願盈君子均持來泛尊酒永以照幽獨

移菊

何中

儘得林間趣閒尋菊本移人家深竹裏楓葉夕陽時  
汲井澆畦潤將鉏下手遲護叢愁蕊損帶土怕根知  
每被歸樵問深憐冷蝶隨寒香生徑術幽事補灣碕  
斗柄西北落鴈聲霜露垂徘徊繞叢昨自笑可能癡

賦得秋菊有佳色

公乘億

陶令籬邊菊秋來色轉佳翠攢千片葉金剪一枝花  
蘆花蜂鬢亂英隨蝶翅斜帶香飄綠綺和酒上烏紗



散漫搖霜彩，嬌妍漏日華。芳菲彭澤見，稱更在誰家。

賦得秋菊有佳色

馮夢禎

佳節麗重陽，名花試晚香。托根依玉砌，布葉近蘭房。  
萬族俱凋翠，孤標獨傲霜。光迷金菡萏，影伴紫鴛鴦。  
向日全呈彩，裁霞半吐黃。映衫分杏子，結佩雜萸囊。  
入釀新傳譜，餐英舊著方。制齡悲冉冉，泥露想瀼瀼。  
桃李真非類，芝蘭許並芳。取將籬下色，聊佐百年觴。

秋暮庭菊紛發

蔡汝楠

萋陰布中庭，暉藻揚時暮。寥次羣卉傷，眷戀孤芳駐。  
宵露凝華滋，晨旭照寒素。香浮上賓筵，影湛清幽臥。

乍見落英繁，彌憶清秋度。欲致山中贈，綿邈蒼江路。  
五言律

摘園菊贈謝僕射舉

王筠

靈芽挺三脊，神芝曜九明。菊花偏可喜，碧葉媚金英。  
重九唯佳節，抱一應元貞。泛酌疑長久，聊薦野人誠。  
賦得殘花菊

唐太宗

階蘭凝曙霜，岸菊照晨光。露濃晞曉笑，風動淺殘香。  
細葉彫輕翠，圓花飛碎黃。還將今歲色，復結後年芳。  
秋菊

駱賓王

擢秀三秋晚，開芳十步中。分黃俱笑日，含翠共搖風。

碎影涵流動，浮香隔岫通。金韞徒可泚，玉笋竟誰同。

菊

駱賓王

可嘆東籬菊，莖疎葉且微。雖言異蘭蕙，亦自有芳菲。  
未泛盈尊酒，徒沾清露輝。當榮君不採，飄落欲何依。

菊

李商隱

黯黯淡淡紫融融，冶冶黃陶令籬邊。色羅含宅裏香，  
幾時禁重露。實是怯殘陽，願泛金鸚鵡。升君白玉堂。

九日陪令公登白樓咏菊

盧綸

瓊尊猶有菊，可以獻留侯。願比三花秀，非同百卉秋。  
金英分蕊細，玉露結房稠。黃雀知恩在，銜飛亦上樓。

咏菊

李嶠

玉律三秋暮，金精九日開。  
榮舒洛媛浦，香汎野人杯。  
蘿扉寒潭側，丰茸曉岸隈。  
黃花今日晚，無復白衣來。

菊

羅隱

籬落歲云暮，數枝聊自芳。  
雪裁纖蕪密，金拆小苞香。  
千載白衣酒，一生青女霜。  
春叢莫輕薄，彼此有行藏。

白菊

張翥

秋天木葉訖，猶有白花殘。  
舉世稀栽得，豪家却盡看。  
片苔相應綠，諸卉獨宜寒。  
幾度攜佳客，登高欲折難。

菊

簡無可

東籬搖落後，密豔被寒催。夾雨驚新拆，經霜忽盡開。  
野香盈客袖，禁蕊泛天杯。不共春蘭並，悠揚遠蝶來。

九日菊花咏應制

僧廣宣

可訝東籬菊，能知節後芳。細枝青玉潤，繁蕊碎金香。  
爽氣浮朝露，濃滋帶夜霜。汎杯傳壽酒，應共樂時康。

萬年厠員外宅賞殘菊

顧非熊

纔過重陽後，人心已爲殘。近霜須苦惜，帶蝶更宜看。  
色減頻驚雨，香消恐漸寒。今朝陶令宅，不醉却應難。

病中朱諫議惠甘菊苗

姚合

蕭蕭一畝官種菊，十餘叢採摘。和芳露封題，寄病翁。

移茶鼎裏餐稱石甌中香氣將何比從來味不同

寒烽採菊蕊

耿漳

遊廳下晴空尋芳到菊叢帶聲來蕊上連影在香中  
去任霑餘露高低順過風終慙異蝴蝶不與夢魂通

依韻和介之未開菊

范仲淹

本非桃李色佳色敢先開席上無言晚霜前幸未摧  
芳心應有待真賞豈須催願上金樽壽何傷蝶不來

重九席上觀金鈴菊

韓琦

黃金綴菊鈴克地獨馳名細葉浮杯雅香筍貯露清  
風休沉夜警雨碎入寒聲自此傳仙種秋芳冠玉京

菊觴

韓琦

九日陪佳客金英泛酒船  
酸醅時上下浮蟻自周旋  
香逐榴花發甘啞栢葉先  
坐中宜醉挹仙籙載延年

和江鄰幾金鈴菊

司馬光

何處見佳菊秋風汶水陽  
酒浮金鐸細露汎蜜房香  
不謂紅塵地相逢君子堂  
依然故人意不減舊芬芳

菊

司馬光

瑣瑣南陽菊秋潭歲自閑  
孤根擁紅葉落蕊媚蒼苔  
正以參靈藥因之值紫臺  
願兼金掌露同入栢梁杯

野菊

司馬光

蒼菊未嘗種秋花何處來羞隨衆草沒故犯早霜開  
寒蝶舞不去夜虫吟更哀幽人自移席小摘泛清杯

和張二少卿丈白菊

邵雍

清淡曉凝霜宜乎殿顯商自知能潔白誰念獨芬芳  
豈爲瓊無豔還驚雪有香素英浮玉液一色混瑤觴

晚菊

范純仁

幽叢有佳色不必趁時開冷艷霜仍借清香蝶自來  
晚香情愈重醉賞日先回且伴芝蘭秀休嗟暮景頽  
對菊有懷郎祖仁

孔平仲

庭下金鈴菊花開已十分多情能惠我對酒獨思君



秀色三秋好清香一室聞扁舟今夜雨何處宿江雲

重陽席上賦菊花

陳襲

折菊東籬下搗觴爲燕遨閑情秋後放幽艷靜中高  
九日陶公酒三閤楚客騷及時須採掇忍使棄蓬蒿

白菊

鄭剛中

春信恐輸梅籬邊趁早開素心甘冷澹秀色肯塵埃  
眼老書慵看官閑吏不催煩君助幽勝小插爲攜來  
答朱寺丞惠千葉桃花菊

蘇頌

分得穠華質依然苦蕙香繁紅如上苑密蕊勝南陽  
不用尋根葉須留過雪霜殷勤送東閣聊薦百年觴

楊妃菊

陸希澄

含笑向籬旁花叢似洞房露濃新出浴霜薄淺成粧  
尚帶霓裳色猶存輦路香故令千載下還許侑瑤觴

蠟梅菊次韻周仙尉

聞人善言

臘前曾弄色秋晚更包黃昔認蜂攢蜜今看蝶戀香  
輩流雖易處名氏却同鄉會見成功女還思九日佳

閏月見九華菊

翁龜翁

眾草已枯霜墻陰獨自芳旋開三四蕊知爲兩重陽  
酒恰今朝熟花多一月香又經風雨後得爾慰淒涼

採菊

李建業

簇簇竟相鮮一枝開幾番味甘資麴蘖香好勝蘭蓀  
古道風搖遠荒籬露壓繁盈筐時採得服餌近知門  
秋夜對菊獨坐

張輔之

誰花兼五美並列小齋前露下金英發霜間紫蒂鮮  
百杯懶陶興一束引彭年秉燭光搖影寒香意獨憐

催菊

狄斯彬

東籬何寂寞空負蝶飛來陶令歸與久黃花安在哉  
秋容愁未破羯鼓喜相催曾向天工祝須教頃刻開

白菊

許棠

所尚雪霜姿非關落帽期香飄風外別影到月中疑

發在林洲後繁當露冷時人間稀有此自古乃無詩

十月菊

地偏開較晚風動可能禁雨漬金英淺寒添紫暈深  
抱叢無晚蝶窺葉有貞禽留待觀寧後梅花約重尋

廣陵對菊簡朱侍御子禮

袁泰

官衙無一事買菊種幽軒留滯非吾意相看豈故園  
金英團露滿碧葉受風翻獨酌懷仙侶無由與晤言

禎祥詩

余闕

舊花已萎絕新花乃再芳都緣秉金氣特解傲司藏  
旖旎生殘馥葳蕤出故房應憐蕙草質戢頰委微霜

觀菊

張養浩

始旦起觀菊滿籬金翠明色嚴霜亦懼香盛世皆清  
凜有英雄氣泊無兒女情柴桑與吾土元白不多爭  
九月十八日黃菊始開時值禁醖

蒲道源

萼萼秋事杳幽叢花始黃直取彫衆卉纔許見孤芳  
重露洗金質嚴風吹綠裳陶翁如有酒何日不重陽

白菊

劉因

仙草尚孤潔東籬菊未芳精神渾似露氣勢已長霜  
夜月藏不得晚風吹更香天教陶靖節素髮與輝光

堂中對菊

丁奉

歸來園業廢只喜爾猶存品絕因陶愛名高爲屈餐  
綵攢諸色靚黃占一叢尊最惜風霜標忠貞合共論

其二

丁奉

斗室無知已憑渠共歲華半籬分曉露五色絢寒霞  
花與人俱僻秋當老更佳落英餐不盡想是屈原家  
後九月九日賞菊

殷士儋

嘉節欣逢閏東籬再舉觴佩萸尋舊約采菊挹餘芳  
劇賞情猶健高吟興轉長還思泛玉醴捧以壽君王

催菊

方孝孺

蚤帶春泥種類添沃壤培如何九日至不見一枝開  
時過花何補天寒客懶來便須連夜發莫負掌中杯

代菊答

方壽孺

生意本天得無人亦自芳但能娛晚節何必媚重陽  
服食多延壽風霜獨擅場祇應爽皓輩心迹可相忘

五九菊

姚廣秀

采采薰風裏英英復傲霜占先榮午日應候媚重陽  
早晚還同色炎涼不改香兩開看總喜知爾越羣芳  
菊時一種數本其一逾秋獨妍委乃至日黃  
花韓然當庭見者驚嘆攜酒來賞余賦詩紀

之

李夢陽

節過諸方盡冬深爾獨妍那知冰雪後復敵菊花筵  
蕊凍黃逾嫩枝疎綠更鮮試令彭澤兒應廢掇英篇

丈菊和王左史

李夢陽

丈菊今朝得低垂九尺闌發遲冬已破移早露猶團  
食蕊寧難及憐芳仰屢觀縱令他處有爭伴醜筵歡  
臥病遇趙君烹菊飲余賦此 徐中行

茂陵消渴後經歲脂金莖忽遇長桑客能餐落菊英  
香烹石鼎網寒泛玉壺清始信靈均賦趨然遺世情

菊莊

何景明



吾憐陶處士瀟洒出塵埃白髮秋逾短黃花晚自開  
百年常對酒九日漫登臺却顧輪蹄者悠悠徒爾哀

汝慶宅紅菊

何景明

紅菊開時暮亭亭冠物華亦知顏色好不是艷陽花  
羅綺嬌秋日樓臺媚晚霞清香如不改常傍美人家

對菊

顧璘

羣芳搖落候生意獨欣欣欲趁霜前賞曾勞雨後分  
黃金開正色紫麝散奇薰願以蘭爲友那知竹是君

其二

幽叢多傍砌淨植故當軒葉抱孤根起花分五色繁

石湖方勒譜菜里漫開園請看東籬下成蹊豈待言

其三

孤標霜莫崇弱質露多恩爲問重陽月誰言芍藥尊  
昂奇千里致根老隔年存千古知心地蕭蕭五柳門

其四

黃菊真宜晚霜寒色轉鮮栽培元得地服食擬登仙  
丹粉休論色笙歌別有天杜陵憔悴客相伴草堂前

賦得席上菊

宗臣

一枝吾在把不必向籬東秋色近相媚寒香夜可終  
酒家疑泛白燭滅似愁紅好爲攜懷袖玄霜下遠空

十日對菊

虞堪

撚花悲節過無酒愁無懽客裏情懷惡江頭風雨寒  
楊雄空識字陶令苦辭官荆璞應難抱牙琴欲罷彈  
十月取野菊從酒

戴昂

野徑菊仍好村壇酒亦嘉未慙今日蕪便是背時花  
心在家千里身猶客九華官程難久駐風雨暮山斜  
菊村

頓銳

一官花作縣三徑菊爲村霜重英堪掇秋高蔴正繁  
寒香標節物冷艷滌蕪煩懶問城中事經年不到門

藝菊

陳璣

偶愜陶公興分苗和土培疎籬隨意補曲徑恰宜栽  
遲暮三秋感芳菲九日開還將桑落酒重泛竹根杯

對菊小集次韻張頂山

駱文盛

高城木葉下采采菊初黃南客深秋思西堂此日籬  
檻雲低送色檐月淨浮香好似元孫侶伊瀛興不怠

紅菊同何大復席上分韻

韓邦靖

紅菊移時晚開花近北堂枝枝穠向日葉葉翠含霜  
細雨幽人宅晴雲妃子粧酒酣一把玩飄泊嘆秋光

買菊

李日華

秋秋纔一日買菊已三秋黃紫初相映高低各互持

倒樽香欲入囊枕夢應遶風雨南窗下閑箋彭澤詩

寺夜看瓶菊

吳鼎芳

分取東籬色磁瓶晚更宜香深攜伎處艷冷著燈時  
夜久僧還對秋深蝶不知莫教歡賞地風露正淒其

九日夜集

宋登春

白酒映樽空黃花泡露濃徵歌來衛女扶醉有巴童  
香霧沉蘭圃晴烟駐桂鼓海風吹月上移席小闌東

十月菊

張獻翼

佳色滿東籬重陽物候遲黃花青女節綠酒白雲期  
閒遲陶公興餐英楚客詞疎林秋不謝酒是採香時

菊山詩贈吳興黃君

柯九思

菊蕊逢秋放山居可醉眠  
落英欹石冷佳色傍雲鮮  
舊摘烟蘿外新栽水竹邊  
思君多道味何日共攀緣

荆門舟中見菊偶成

李流芳

江路重陽月荒城菊未花  
一枝今始見小摘向人誇  
新水添生意鄉心對物華  
遙憐開爛漫濁酒過鄰家

卽席賦露中菊

朱潛

衆芳春競發寒菊露偏滋  
受氣何曾異開花獨自遲  
晚成猶有分欲採未過時  
忍棄東籬下看隨秋草衰

吳明府送菊次韻答之

陳獻章

黃菊有名花淵明無酒官酒多人自醉花好月同看  
老未厭人世天教共歲寒未應攜不去高步蓬萊山

菊畦

申時行

誅茅疏野徑種菊擬山家秀擢三秋幹奇芬五色葩  
凌霜留晚節殿歲奪春華爲道餐英好東籬興獨賒

冬菊

袁宏道

衆芳無不改籬菊晚猶開護葉多編竹憐香自剪葉  
驚心寒節破載酒故人來忽憶東籬叟狂歌試舉杯  
邀友于使院園亭觀菊

王世貞

小閣餘幽賞西風菊數枝徑延三益迤花毀衆芳遲

薄祿猶能醲微名懶自持王弘郡齋好籃輦倘相隨

題菊

張以寧

艸木已衰萎時菊方敷榮林空晚色淨日暮孤烟橫  
仰蔭修竹枝俯挹蒙泉清歲月忽後易採擷傷吾情

閏九月張用文宅賞菊

張以寧

紅芳驕白髮素質笑青娥晚色濃還淡秋香寒更多  
賞心能幾許裊節欲如何安得長逢閏年年兩度過

五言絕

菊

杜甫

每恨陶彭澤無錢對菊花如今九日至自覺酒須賒



將赴湖州留題亭菊

杜牧

陶菊手自種，楚蘭心有期。遙知度江日，正是樹芳時。

折菊

杜牧

籬東菊徑深，折得孤自吟。雨中衣半濕，擁鼻自知心。

和張尹憶東籬菊

李端

傳書報劉尹，何事憶陶家。若爲籬邊菊，山中有此花。

黃菊詩

顧况

時菊凝曉露，露華滴秋澗。仙人釀酒熟，醉裏飛空山。

新菊

姚合

黃金色未足，摘取且新嘗。若待重陽日，何時異衆香。

詠菊

徐鉉

細麗披金彩，氛氳散遠馨。  
汎杯頻奉賜，緣解制頽齡。

十月菊

薛瑩

昨夜樽前拆，方人耐曉光。  
今朝籬下見，滿地委殘芳。

咏菊

陳叔達

霜間開紫蒂，露下發金英。  
但令逢採摘，寧辭獨晚榮。

叢菊

石延年

風勁香逾遠，霜寒色更鮮。  
秋光買不斷，無意學金錢。

九日對園菊

王十朋

佳節逢吹帽，黃金染菊叢。  
淵明何處飲，三徑冷香中。

十月望日買菊一株頗佳

王十朋

秋去菊方好天寒花自香  
深懷傲霜意那肯始重陽

殘菊

梅堯臣

零落黃金蕊雖枯不改香  
深叢隱孤秀猶得奉清觴

菊隱

張杖

不肯競桃李甘心同艾蒿  
德人一題品愈覺風味高

菊澆

洪适

夕英色衰落小摘尚盈襟  
錯會離騷意元無滿地金

茉莉菊

洪适

化工將茉莉改作壽潭花  
零露圍佳色鶯黃自一家

對菊

鄭思肖

日月雖云逝，山中秋自香。  
平生抱正色，誰怕夜來霜。

其二

三徑今非昔，多愁老此身。  
誰知陶靖節，只是晉朝人。

菊

王穀祥

颯颯金風度，媽媽秋色妍。  
白衣還自至，青女更相憐。

和丁端叔菊花

楊廷秀

忽忽還重九，匆匆又歲華。  
不妨將白髮，剝與插黃花。

五九菊

汪膺

生氣亘陽月，九五當敷奇。  
菊花于此日，爛漫開金巵。

墨菊

藍山

晚節黃金盡  
霜枝淡墨新  
東籬日昏黑  
不見白衣人

菊

李俊民

色笑秋光淡  
香嫌酒力慳  
東籬在何處  
客裡見南山

墨菊

貢性之

醉折東籬朵  
看如隔暮烟  
莫驚顏色改  
不是義熙年

種菊

凌儒

幾種秋容好  
東籬手自栽  
陶潛無限興  
還待白衣來

霜後菊

凌儒

盃把香堪摘  
一尊誰爲道  
斯人逸千載  
高興落東籬

靖節采菊

姚勉

腰不爲米折頭獨祿菊低晚節名元亮思與隆中齊

買菊

吳國倫

山中澆園子掘菊換金錢沽酒飲其華將無學延年

菊

陳淳

離落秋來好黃花照眼新西風吹短鬢還憶種花人

其二

我愛東籬下秋深菊自花何人能送酒相對晚山斜

菊

陳淳

清霜下籬落佳色散花枝載咏南山句幽懷不自持

六言絕

周鎬送白菊乞詩

陳獻章

白菊偏宜素髮青山只對蒼顏  
燕罷秋香滿腹風吹不到長安

藝菊志四卷